

遲得恰好的告白

作者: 皓旅人

Powered by [紙言](#)

第一集

五月二十九日是我的畢業典禮。平日跟本不願打理自己儀容的我，今天竟然會有所準備。先是幾天前，我刻意走到髮型屋，製作一個新的造型送給自己，然後再在今天早上刻意早點起床，先戴上隱形眼鏡，再為自己頭上那黑森林作最後的點綴。朋友們每當留意到我的即時動態時，都會紛紛問道：「你係唔係轉性呀，做乜鬼無啦啦學人走型格風？」

在藍光面前的我，通常只會輕輕一笑，錄音回覆：「冇計啦，你地個個都响謝師宴之前做好曬準備，咁我剪返好個頭都係好正常姐。我唔想做『那年十八』嘅主角呀！」語畢，我關上手機。當看到了手機桌面上和她在最後一天的合照時，我會心微笑了一番。

到底，我是為了他們而刻意打扮，還是只為了一個人而改變自己，換取她的注視？

到了禮堂，身邊的同學都帶著不一樣的眼光注視著我，他們也紛紛說道：「嘩你今日好唔同喎」、「嘩你終於都拆牙箍喇喎」、「嘩你Jel埋頭喎，好在今日冇畢業帽啫」……然而，我也只是逐一隨便回應罷了。

因為，在這片寒暄的背後，我集中精神，努力環顧四周，尋找她的身影。

原來，她坐在遠遠的頒獎席上，與旁邊的好友聊天。今天的她不太一樣，給了別人多一份清新的感覺，還有鼓莫名的自信從身上散發出來。她放下了昔日的普通馬尾，換上了一個心形麻花的低馬尾編髮造型，放下沉悶的黑框眼鏡，大概是換上了讓人擁有水汪汪大眼睛的隱形眼鏡。整個人看起來，就像一位萍水相逢的小姑娘，終於找到屬於自己的幸福，屬於自己的白馬王子，預備過上畢生的幸福之旅。我會心微笑，大概也相信她的造型襯得起今天畢業典禮的大日子。

「而家有請上一屆嘅學生會主席，高穎儀同學代表一眾中六學生分享呢六年來嘅感想。」主持語畢，掌聲便立刻歡送不一樣的高兒，慢步走上台前。當身邊的同學開始留意到她的新造型時，都紛紛在台下評頭品足起來，唯獨我獨坐禮堂一角，欣賞那鏡花水月的容貌，滿心期盼著這不是出自藍染那片刻的幻覺，而是真實存在的美麗。

「嘉賓、各位家長、各位老師、各位同學早晨。六年過去，我地六年嘅青春就咁放左落呢一間學校入面。到頭來，我地得到左啲咩，又同時失去左啲咩？」說到這裡，同學們開始收起剛才的聲音，把握剩餘的在校的光陰來細聽她的一字一句。「响無情嘅教育制度入面，我地都用左唔少嘅時間响學習書本知識上面。但係，又有邊一個已經發現，我地就算幾努力都好，都唔可以响個堆書上面領略到任何人生嘅智慧同埋社會上生存嘅方法。結果，我地就窮到只係得返用唔到嘅學問，失去左同社會嘅連繫。除此之外，我地亦都失去左人與人之間嗰一份應該要有嘅溫度，仲記唔記得陳老師？佢係我中三時候認識嘅一位高中英文老師。一開頭，我都係因為嗰啲閱讀報告所以先識佢，之後都問唔中都會响放飯嘅時候同佢一齊食下飯傾下計。不過，到左中四嘅年頭，佢就已經因為太辛苦嘅關係而離開左呢一個地方。我仲好記得佢最後一次食飯嘅時候同我講過嘅一句說話，就係以前讀書開心好多，而家人與人之間唔知點解，好似中間多左棟牆咁，呢棟牆可能係教程，可能係功課，可能係成績，可能係排名。我諗，每一位中六學生都同我一樣，感受過公開考試嘅壓力，明白佢點樣令我地失去人與人之間嘅溫度。我地有冇一刻曾經因為以上嘅嘢，令我地問返自己，究竟呢到係一個教育人嘅地方，定還是只係一個教學生嘅地獄呢？」說到這裡，整個禮堂頓時變得鴉雀無聲，每個人都靜下來沉思著高兒那一句一句的控訴。

「不過，講到咁負面，我都係仍然好感恩自己可以响八三八入面渡過自己呢六年嘅美好時光。正正因為

我地好容易會失去同社會之間嘅連繫，學校都會主動印曬資料鼓勵我地多啲出去做下義工，以義工方式接觸社會各個階層嘅市民，而老師亦都會鼓勵我地試下返暑期工，感受一下响社會生活嘅第九味。除此之外，正正因為我地响呢個制度下好容易失去人與人之間嘅溫度，我地先至會特別珍惜自己同每一位同學同老師之間嘅感情。講到呢到，我特別想多謝一位對我嘅人生好重要嘅人.....」

·
說到這裡，在我身旁的友人突然爆了一句：「唔__係呀？！玩台上表白？！佢唔係啱啱先同個仆街分手嘅咩？！」語畢，他面向我，而我也只能無言以對.....

·
三年來的感情，難道我現在就要面對她已經有男朋友的事實？難道我的單戀也需要有失戀的結局？難道我要抱著未有表白的遺憾走上大學？難道網絡小說的主角也需要配上一個失戀的結局？

·
內心呼喊出的千言萬語，在我腦海中像流星般略過，我無法從畢業典禮的中途抽身而退，只能夠坐著用生命值硬接。

第二集

「就係通識嘅陳老師.....」高兒說。

「吓！唔係嘛！咁彩虹？！仲要咁成熟？！」友人回應道。

「佢用左好多上堂嘅時間來解釋做人嘅道理，令我獲益良多.....」

「__！原來係吹奏嗰位俾人玩手机嘅老海鮮.....」友人立即喝倒采。

「最後，我仲要多謝同我相處左咁多年嘅每位同學，我當然唔可以代表曬你地每一位，但都希望我嘅分享能夠响你地心入面留下一絲共鳴，成為你地响畢業之前嘅最後一個美好回憶，我係高穎儀，大家可以叫我高兒，請繼續多多指教，多謝。」

就這樣，她就結束了自己的分享；就這樣，她就帶著微笑接上那個寫著「年度最傑出畢業生」的獎狀；就這樣，畢業典禮也就結束了；就這樣，我就成為一個舊生，可以鬆一口氣了。

典禮過後，同學們慢步前往操場，各自與家人和朋友作最後的中學校園合照。

「喂，畢業快樂呀老友！」呀文拍了拍我的肩膀。

「喂呀文！畢業快樂呀！」我緊抱了他一下，畢竟我已經與他經歷了兩次畢業典禮，能夠與這位難得一遇的朋友共同走過12年，我是打從心底地珍惜這段友誼的。

當我們拍過照片以後，呀文主動與我繼續打開話匣子，說：「你搵左賢仔同男神影左相未？痴線架！佢地兩個而家真係畀女圍呀！成班師妹圍住佢地話要影相，我而家去影都要排隊等佢地啲，你話係咪認真誇張吖？」

「喺呀，一早遇左啦，所以我頭先一落到來就即刻搵佢影左相先，費事麻煩。」我從容地回應道。

「哦。咁隔離嗰個女神高兒你都搞掂咗啦係咪？你咁鬼叻！」他立即嘲諷我。

「唔好搞佢啦，佢今日咁鬼忙，Grad Din都仲有得見啫。」我隨隨便便回應他。

「唔係呀嘛大佬！你仲要縮埋自己幾耐呀？你睇下你女神，佢今日著嘅雖然都好似係一件普通嘅校服，但係我就唔知點解硬係覺得佢靚咗好多咁，簡直就係升咗上一個新嘅層次，Delicious~」呀文帶著食評家的口吻說道，令我忍俊不禁。

「或者，呢啲可能就係你平時成日講嘅仙氣囉。」我一邊回應呀文，一邊注視著數步之遙的高兒，看著她與友人聊天聊得開心的時候，一種幸福的感覺也會油然而生。

「你睇下你，開心到咁。鍾意人地咪講囉！我都唔明你，中三嘅時候就一早應該要.....」呀文和我一同注視著她。

「傻啦，佢個時已經有仔喇。」我決定打斷他的說話。

「嗰時還嗰時啦！我記得佢條仔。高兒中三年尾先識嗰個仆街咁嘛，佢地而家都散左半年啦！點解你仲唔同佢.....」呀文繼續說下去

「得啦，我有分數，呢啲嘢遲啲先算啦，好唔好？」我再次打斷他的說話，想終止與他有關高兒的討論。

「Okay, Fine. 是但你，係咁先！」呀文轉身離開，尋找別的朋友繼續拍照。

回想三年前的時候，當時的我和高兒同班，我們恰好志趣相投，大家都喜歡玩音樂。所以，我和她在音樂室也留下了不少美好回憶。

但是，最深刻的回憶，往往都是傷感的。

我還記得那一晚，當我在街上慢跑，跑進公園休息的時候，我隱約聽到她的聲音從公園的遊樂場傳出來。我悄悄地走進公園，而觸目所見的，就是高兒和另一個陌生男人的背影。我知道她是高兒，因為她的馬尾是與別不同的，我不懂怎樣形容.....[佢嗰時中三，我都係唔形容了，自行意會啦，小心FBI]

「點呀，今日玩得開唔開心？」那位陌生男人的聲音令我生厭。那輕佻的口吻，使我更確信他是個玩弄感情的賤男，但高兒大概不會意會到。

「都Okay啦！始於我都好耐冇去過OP搭纜車喇。」高兒回應道。

「你鍾意嘅話我，我每個星期都陪你去又點話啫！係呢，鍾唔鍾意我呢份禮物？」

「鍾意呀，呢個雙子座水晶都幾靚吖！」

「係架，不過呢個星座就慘啲囉！次次生日都係考試，你話係唔係先？」

「啱呀，我真係唔係太鍾意考試.....」

「咁，你鍾唔鍾意我？」那位陌生男人刻意打斷了高兒的說話，繼續說：「我都同你講左咁多次啦，次次都話考慮考慮，我都只係想搵一個紀念日同你慶祝下姐，點呀高兒姐？賞唔賞面畀次機會我？」

「車！邊個話一定要同你喺埋一齊？」我隱約看到高兒的背影慢慢靠近她旁的男人上。

「高穎儀，今日呢就七月二，好日子來架！加埋就長長久久架喇！」那個陌生男人把他的手輕輕搭上高兒的肩膊上，令我有一種說不出的難受。

最後，高兒輕輕的點頭。此時此，我彷彿意會到下一秒即將要發生什麼事情。於是，我緊握雙拳，拚命逃離現場。內心不知怎的，有團熱氣直衝腦門，在我眼眶中打轉，慢慢矇矓了我的視線。

「喂！諗咩諗得咁入神呀？」高兒大力拍了一下我的肩膊，把我從回憶中拉回到現實。

第三集

「你做咩眼濕濕嘅？係咪我用力得滯？Sorry呀！」她輕輕拿起口袋裡的紙巾，在我眼角上印了幾下。

「唔該你.....高兒.....」我剛剛才回過神來，就被她用紙巾抹走眼角上的淚痕，霎時間不懂得如何反應，只能夠支支吾吾地回答。

「多咩謝吖！我應該要say sorry先真啦！」高兒說。

「痴線啦！Sor咩ry姐！都唔係因為你.....至少唔係而家嘅你.....」我刻意壓下聲線。不知怎的，我不想她知道我在想甚麼，我不想把心裡深處的秘密告訴給她，我不知道她會怎樣看待我。

「咩話，你啱啱先最後講咩話？」高兒問。

「冇野.....冇野.....」當我隨便回覆高兒的時候，內心其實有千百種聲音在與自己訓話：「中六喇！畢業喇！你仲唔同佢講？」「真係最後一次架喇，個天畀多一次機會你你都唔要？」「佢演講嘅時候你唔係好著緊佢架咩？比啲火自己啦！唔好畀自己留有遺憾！」

也許，我需要鼓起勇氣，說出那遲了三年的告白。

「Hey!」正當高兒要轉身離場之際，我鼓起了勇氣向她說：「你今晚得唔得閒？不如我地食飯慶祝？」語畢，緊張的我心跳不斷加速，像是處於一個無目的的長跑中越跑越快。我正等待著一個原因，讓自己停下來轉向，衝向真正屬於自己的終點。

「唔啦！我今晚約左班fd打邊爐呀！」高兒以輕鬆的語氣，實實在在地給了我一個無情的回覆。

我無言以對，只把視線移開，站在一旁呼出一口帶著失望的空氣，再從容地聳了聳肩，向她示意表示明白。

突然，高兒把頭伸到我的耳邊，細聲說：「不過，我今晚仲未約人食糖水，不如11點松記等吖！」語畢，她的樣貌再次進入我的視線。當我正想示意不要麻煩她的時候，我看到她那無比溫柔的笑容，和她那天真無邪的眼神，彷彿把我再次帶進了中三時相處的時光.....

那些一點一滴的回憶，被她以一個眼神全部帶回來.....

也許，我真的從中三便喜歡她。

也許，我到現在仍然緊記著這種感覺。

也許，今晚是最後一天，讓我可以補上一個遲了三年的告白。

但是，她真的喜歡我嗎？

但是，這一切一切會否都只是我的一廂情願，痴心妄想？

但是，如果我表白失敗的話，我便會永遠失去她。我能夠承受這種傷痛嗎？

千言萬語在我腦海中縈繞著，我又再一次不懂得如何是好。

「你唔出聲我就當你應承架喇啎，到時見！」語畢，高兒又跑到別的朋友身旁，繼續聊天和拍照。

時間過得比想像中慢，平日自己十分喜歡的放題晚餐，今晚也沒有心情與友人吃。此刻，我只是惦記著高兒臨行前對我講過的一番說話。

晚飯過後，我徑自離場，孤身一人走到荃灣松記的門口，靜候她的出現。忽然間，有個喝到半醉的女生，從兩元豆花店的那一方走過來，手上拿著一罐1664。我帶著一份不安的感覺，注視著她。我發現她就是賢仔的女朋友——小雪。

當我看到好幾乎要跌倒之際，我決定衝上前接住她。

「做咩呀你，畢完業就飲到咁醉，賢仔去左邊到呀？」我帶著緊張的語氣問道。

小雪用力地推開了我的手，勉強地站著回應：「唔好响我面前再提起嗰個人個名，我唔想再諗起呢個衰人！」

「唔好咩呀！係咪又玩分手呀？係咁都唔洗飲到咁醉姐，佢今次又搞乜野呀？」

「佢今次玩認真。」小雪帶著心碎的愁容低下頭。

「唔好咁啦！唔洗咁難過先嘅，或者你比啲時間我，等我再同佢講下啦。」我遞上紙巾，希望能夠為她做一點事情，至少讓她冷靜下來。

突然，小雪踏前一步走近我，一下子大力摟著我說：「點解你要對我咁好？點解？」語畢，她又開始哭起來了。

「你唔好講呢啲住先啦！」我不懂得如何反應。

「唔係咁架！點解你唔可以靚仔過佢，Charm過佢，咁我嗰陣鍾意嗰個，咪會係你囉！點解我而家會鍾意左一個，對愛情玩玩下，對我玩玩下嘅人？」她雙眼通紅地盯著我，說出了一句讓我不敢相信的說話。

第四集

回想起中三那年的暑假，當高兒與那個賤男走在一起的時候，我真的既憤怒又傷心。憤怒的，是高兒一直不知道站在她旁邊的那位是個愛情玩家，還要與我多番理論，處處維護他。更甚的是，那個賤男竟然藉著這個原因來叫高兒疏遠我。看著她在校園中越走越遠的身影，我不只痛恨他，還痛恨自己不懂得如何好好保護高兒。

日子一天一天過去，在短短兩年間，她再也沒有在音樂室出現。反而常常在紅社的工作室中，我們可以很輕易看見她拿著一疊又一疊的文件東奔西跑，為社服務。最終在中五年頭，她成為了一位文武雙全，美貌與智慧並重的社長，獲得老師們的垂青，也獲得同學們的認可，是那位帶著自信，站在舞台上、鎂光燈前的女主角。

而我？依舊是那一個戴著牙箍，在音樂室中毫不起眼的一個平凡中學生。用處？也許是在男神和賢仔在彈結他唱歌表演之際，以琴聲附和歡呼聲，以「毒氣」襯托帥氣。小雪？是那位老是常出現的觀眾。

她總是用攝影機拍下我們不同的演出，在表現過後慢慢享受剛才的一點一滴。有時候，她會刻意留下來等待呀賢和男神拍照。但她拿害羞的性格，令她總不能夠和別的女生爭奪一個合照和談天的機會，只是成為最後一位離場的觀眾，或是唯一一位與我聊天的觀眾。

「又見到你嘅？」剛剛表演完畢的我一邊拿著手巾抹汗，一邊與站在一旁的小雪聊天。

「係呀，我知道你地今日有表演，所以補完課咪.....過來睇下咁囉...」不知道她是緊張還是害羞，令她說起話來結結巴巴的。

「你想同佢地影相？」我指著呀賢和男神，帶著微笑地問道。小雪也輕輕地點頭。

「咁不如我幫你手叫佢地吖！」

「唔洗啦，佢地仲同緊好多人影相。」

「你唔好咁怕醜啦，我知道你來過好多次，今次就等我幫你啦！」

接著，我真邀請了呀賢和男神與小雪拍照，還安排了小雪和我們三人一同吃晚餐。而我亦因為這次事件與小雪打開了話匣子，在多個晚上與她透過電話談天。

談著談著，我便對她越來越有好感。有時候，我們會一同吃午餐，一同放學回家，一同到自修室溫習DSE。可是我卻想不到，不論我對她有多大的好感，她一早就已經把賢仔放在自己的理想對象的清單當中。我又再一次，未戀先失戀了。

但我知道，小雪是真心喜歡賢仔的，而賢仔也是我的好朋友。所以今次，我決定好好埋藏自己的失望和傷感，勇敢地去鼓勵小雪追求屬於自己的愛。

DSE過後，我決定獨自到台灣來一趟單身旅行。我答應自己，暫時不要喜歡上別的人，因為喜歡這兩個字，對我來說不是希望，如是一次又一次的失望和絕望。

我還記得最後一個晚上與小雪談心，她也是紅著眼睛地跟我說一番感激的說話。想不到現在，事情竟然發展成如此地步，她現在竟然紅著眼鏡，由感激我變作埋怨我，控訴我的樣貌，控訴我的吸引力。

我無言以對，因為現在的小雪，已經不是以前那個單純的小雪。原來愛的相反——傷心和怨恨，是可以令一個單純的人變作陌生人。我相信此時此刻的她，已經忘記了我當初的種種努力，忘記了我當初為她穿針引線，結識呀賢和男神，忘記了我當初為她向呀賢表明心意，甚至忘記了我當初對她的感覺。

看著這個陌生的小雪，我只是淡然回應道：「有啲野，唔係玩唔玩就算。我都鍾意過一個幫我走出陰霾，對我好重要嘅人。可惜，當我而家睇返嘅時候，成件事已經唔再一樣。所以，你振作的先啦。」我用力抱起她，希望她能夠先站穩。

突然，電話響起。

「喂，係咪高兒你呀，你去到邊？」

「唔好意思呀，我都係唔食甜品喇，下次有機會先再見啦。」

高兒從電話傳出來的聲音，在我身後也隱約聽見。當我轉身之際，我看到那戴著心形麻花造型的身影正慢慢放下電話離開。

今次，我想我大概不會再埋藏自己的感受了。

今次，我想我大概不會再拖延下去了。

今次，我不能再遲了。

我知道，她對我很重要，她比小雪，比任何人都更重要。如果我再不捉緊這個機會，我大概會後悔一生。

我決定強行鬆開小雪，追趕高兒。「喝！咪走住呀高穎儀！頭先係誤會炸！」我放聲對著她呼喊，怎料她竟越跑越快。

我由松記一直追，追到荃灣西站對外的海旁。

「喂高兒！你聽埋我講先！頭先真係誤會來架！」我氣喘噓噓地喊著。

「我唔聽！我唔想聽到你講嘢呀！」她蹲下來，低著頭哭訴，說：「點解你要咁樣對我？點解你唔可以好似對小雪咁對我咁好？你知唔知，我由中三開始一直最鍾意嘅都係你，我一直係咁拒絕呀嵐，都係希望你有一日會親口同我講你鍾意我，但係你一直都冇。我唔知我由頭到尾係咪一廂情願咁，鍾意左一個唔鍾意自己嘅人。到我分左手，想同你講清楚嘅時候，你又已經同另一個曖昧緊。你知唔知當時嘅我有幾咁傷心呀？你知唔知？」

「唔係咁架，我……」

「咩唔係咁？當時嘅我好迷失，好想死。但我知道考試嚟緊，我唔可以畀呢啲事情影響到我嘅升學。結果，我喺嗰個時候決定要忘記你。但係估唔到嘅係，我竟然又响台灣遇返你，所有嘅感覺都返曬嚟，點解個天要咁樣對我？點解呀？」

「對唔住呀高兒，嗰陣時嘅我……」

第五集+後記+重載感言

「點解嗰陣時你要同我講，你已經完全放低咗佢。點解嗰陣時嘅你要畀一個假希望我。點解你要令我覺得自己好特別，然後又再次傷害我。我究竟做錯咗啲乜嘢？你點解會咁熟練？」她紅著眼睛看著我，但比小雪的感覺來得更強烈。不知怎的，我有一種心如刀割的痛，可能這就是內疚。

看著她的淚痕，感受著一陣陣吹來的海風，原本遞上紙巾的一個簡單動作，頓時也變得份外困難。高兒不想再看著我，她輕輕轉身靠在海濱長廊的欄杆，慢慢用手肘抹乾眼淚，再拿起手機把玩起來。

「對唔住呀高穎儀。雖然遲咗三年，但我發現我一直放唔低，一直最鍾意嗰個係你，一直都係你。」我鼓起勇氣從她的身後抱緊她，把埋藏於心底多年的句子說出。

高兒似乎開始冷靜下來了，我把她溫柔地轉回自己面前，輕輕按著她的頭，再抱在胸膛前，感受這份難以形容的溫度。現在，彷彿一切都已經變得不再重要，我只想好好捉緊心跳，與高兒追回這三年的時光。

「好耐都冇試過咁樣抱住你喇...」高兒靜靜地說。

「係咩？台灣唔係試過喇咩，都唔係過左好耐姐~」我回應道。

「嗰次唔算呀！嗰啲位都唔關事。」高兒抬起頭來，一邊摟著我，一邊看著我。

「係咩？」我還她一個暗笑。

她突然用力捏了我一下，讓我大叫一聲。

「做咩無啦啦搵我呀！黑人問號？」我不滿的道。

「咁點解我頭先會見到你攬住小雪，仲幫佢抹眼淚咩？我仲聽到你講話咩以前好鍾意我，但而家個感覺唔一樣，你係咪想溝返佢？」伴隨著這條問題，她帶著那熱切期盼的目光再次看著我，讓我頓時不知所措。

我微微用力推開她，但我倆仍兩手緊扣著，我帶著那把對女朋友才會如此溫柔的聲線，向她娓娓道來事實真相：「高穎儀，你唔好諗多咗啦。嗰個唔係你嚟㗎！我嗰陣時講緊係小雪唔係你。咁我當年真係對佢有好感㗎嘛，我想同佢喺埋一齊。但係，我而家睇返，我根本唔係鍾意佢呢種人。」

「咁你嗰時鍾意佢啲乜？身材？」語畢，她又再一次盯著我看。

我情不自禁，帶著一份尷尬的笑容看著她，和她的上半身，再說：「咪玩啦，我係睇身材嘅話，就一早唔揀你啦！」

「頂你！死cheap精。」她想鬆開我的手，但我仍然用力緊緊捉著她。因為這一次，我不可以像台灣旅行一樣，讓她跑掉了。

「你話我係咪係囉。不過，你真係覺得我似啲咁嘅人咩？」

「好！咁我畀你講，你鍾意佢啲乜？」

「你真係要問？」

「係！」

「我鍾意佢，係因為我嗰陣時喺佢身上見到你嘅身影，一個我當時得唔到嘅身影.....」語畢，她收回剛才的眼神，面無表情地看著海旁。

「我知我係衰.....但係！所以個天都冇畀我溝到佢囉。相反，佢仲要搵咗個天使嚟拯救我嘅啲！」

「今次又邊個女神呀？」

「你又真係要問？」

「係！」

我打開我的手機，在打開相機內的自拍模式，遞給她。

「呢個女神囉！我知道今日五月廿九係佢嘅生日，所以我親手整左份禮物畀佢。」我從背包中拿出自己親手製作的一束花。「我唔知佢今晚係咪真係會落嚟搵我㗎，如果我見唔到佢嘅話可能我就會寄呢紮花上天堂，然後寫低『對唔住，我好中意你』就算。不過好在，上天對我不薄，佢而家都喺我身邊。呢紮花係送畀高穎儀你嘅，18歲生日快樂」

當高穎儀接過這束花後，眼淚又再次奪眶而出了。但此時此刻的她，是帶著笑容去哭，哭成一個最美麗和最幸福的女人。

[第一季完]

插畫：Fat Ki @fatkiiii

後記：好多謝大家一直以來都支持我寫唔同類型嘅故事。我文筆唔算好好，故事嘅爆炸位亦都唔係特別大，多謝你地仍然堅持去睇完呢個接近8000字嘅校園純愛情小故事。當初DSE完左之後一直都有寫愛情小說嘅打算，但我一直都未好好構思到一個完整嘅故事，同第二三季往後嘅發展大綱。直到五月廿八晚上嘅深宵忽然有靈感，於是即刻用紙同筆係咁，同個故事搏鬥左幾日。輾轉來到7月中，當我開始有返多少少時間處理自己嘅小說創作嘅時候，我就即刻打埋淨低嘅文章，趕及將呢個故事喺兩個月內完結。嚟緊我將會將呢個故事嘅前傳，台灣旅行篇寫出來，不過呢個就可能要等到我開學之後穩定咗生活先至可以繼續做喇。另外，有好多人問我靈氣師係咪爛咗尾。我可以好肯定咁同你講唔係！嚟緊我將會以短篇嘅形式盡力出多啲，希望大家會支持。

重載感言：當初因為覺得插圖唔係太靚，所以收埋咗個故事。之後遇到FatKi幫手，將五集嘅圖畫重新畫過一次。真係好感激佢幫我手完成咗呢一件事。以前決定寫唔寫落去，其中一個掙扎嘅位置就係身邊唔同嘅人嘅批評。而家決定寫唔寫落去，反而係自己同自己嘅掙扎，我發現自己嘅拖延症真係好勁。嚟緊我想繼續寫主角當年去台灣，自己一個畢業旅行嘅故事，完成返第二季嘅故事線，就算自己幾唔得閒都好，就算自己拖延症幾嚴重都好，我都想繼續做好件事。因為說故事，真係一場精彩嘅冒險。對於皓旅人來講，亦都係一次難忘嘅旅程。希望大家喺我嘅旅程當中，沿途有所得着。再次多謝大家拖咁多個星期稿都肯睇晒成個故事。

靈感：20190528

動筆：20190529

面世：20190604

完結：20190716

重載：20200719

終結：20201010